

四庫全書

史部

欽定四庫全書

史部

新安志

目錄
卷一至三

詳校官監察御史臣沈孫璉

檢討臣德生覆勘

覆校官中書臣朱鈐

校對官中書臣朱烱

謄錄貢生臣陳昌敬

欽定四庫全書

史部十一

新安志

地理類三

都會郡縣之屬

提要

臣等謹案新安志十卷宋羅願撰源有爾雅翼已著錄初梁蕭幾作新安山水記王篤又作新安記唐亦有歙州圖經及宋大中祥符中李宗諤撰次州郡圖經頒之天下于是舊志皆佚洎經方臘之亂新圖經亦隨散失願

嘗雜採諸書創為稿本而未就淳熙二年趙
不悔為州守乃俾原續成之其書第一卷為
州郡第二卷為物產貢賦第三卷至五卷為
所屬之歙休寧祁門婺源績溪黟六縣第六
卷七卷為先達第八卷為進士題名凡賢良
明經獻策賜策特奏名武舉皆附之義名仙
釋亦併在是卷九卷為牧守十卷為雜錄叙
述簡括引據亦極典核于先達皆書其官別

於史傳較為有體其物產一門乃願專門之
學徵引尤為該備其所志貢物如乾蘗藥臘
芽茶細布之類皆史志所未載所列先達小
傳具有始末如汪藻曾為符寶郎之類亦多
史傳所遺趙不悔序稱其博物洽聞故論載
甚廣而其序事又自得立言之法願自序亦
自以為儒者之書具有微旨不同抄取記簿
皆不愧也程敏政新安文獻志記願所作胡

舜陟墓誌後曰鄂州新安志于王黼之害王
俞秦檜之殺舜陟皆畧而不書苟非得虛谷
一白之則其蹟泯矣然則是書精博雖未
易及至其義類取舍之間疑有大可議者姑
記二事以諗觀者云云案劉克莊後村詩話
謂舜陟欲為秦檜父建祠高登不可因劾登
以媚檜會舜陟以他事忤檜下獄死登乃得
免則舜陟之死乃欲附檜而反見擠耳願之

不書殆非無意未可遽以為曲筆也乾隆四十六年八月恭校上

總纂官臣紀昀陸錫熊臣孫士毅

總校官臣陸費墀

欽定四庫全書

史部十一

新安志目錄

地理類三都會郡縣之屬

卷一

州郡

沿革

分野

風俗

封建

境土

治所

城社

道路

戸口

姓氏

坊市

官府

廟學

貢院

放生池

館驛

倉庫

刑獄

營寨

郵傳

祠廟

卷二

物產

穀粟

蔬茹

藥物

木果

水族

羽族

獸類

畜擾

貨賄

貢賦

稅則

雜錢

夏稅物帛

小麥

秋稅糙米

折帛錢

進貢

供物帛

上供紙

酒課

稅課

茶課

鹽課

公用

卷三

歙縣

沿革

縣境

鎮寨

戶口

田畝

租稅

酒稅

城社

官廨

鄉里

道路

橋梁

津渡

山阜

水源

古跡

祠廟

道觀

僧寺

丘墓

碑碣

賢宰

卷四

休寧

五縣事目略如歙縣

祁門

卷五

婺源

績溪

黟縣

卷六

先達

程儀同

程都督

吳御史

王校正

汪處士

舒狀元

呂侍郎

大魏太尉

查祕監

張度支

許司封

許承旨

謝諫議

張密學

小魏太尉

查賢良

俞待制

俞侍郎

洪比部

聶內翰

許待制

許長官

呂狀元

孫工部

卷七

先達

王提刑

汪宣德

洪尚書

胡金部

胡司業

黃侍御

汪丞相

程顯學

凌待制

汪內翰

胡待制

汪少卿

胡殿院

先君尚書

朱吏部

汪樞密

金尚書

卷八

進士題名

賢良方正一人

進士貢士二百三十四

人

明經二人

發運使賜第二人

樂成獻頌並銓試賜第

共四人

貢士獻策一人

特奏名三十三人

武舉四人

義民

黃芮

章氏二女

汪廷美

葉氏女

詹惠明

仙釋

方儲

許宣平

聶師道

聶紹元

丘寺丞

鄭姑

程惟象

張擴

智琚

定莊

茂源

謙禪師

澗大德

雪山子

寧道者

宗白頭

卷九

牧守

吳五人

晉三人

宋十二人

齊五人

梁十二人

陳五人

唐三十六人

吳楊氏三人

南唐一人

國朝宣和前二十九人

宣和後見壁者三十六人

卷十

雜錄

人事

詩話

雜藝

硯

紙

墨

定數

神異

記聞

新安志原序

新安在秦漢為黟歙二縣漢末別於丹陽以自為郡其山川風土則已見於中古矣漸江之水出於鄣山則章亥之所步禹之所錄也桐汭之地為黟故境則楚子西子期之所爭丘明之所記也至於漢氏兩以疏封骨肉為諸侯王國又丹陽都尉之所理會稽太守之所遁皆班班著見至梁蕭幾為新安太守愛其山水始為之記又有王篤新安記唐有歙州圖經國朝太平興國中詔

編廣記往往摭取之至大中祥符中頒李宗諤所修新圖經於天下則由前諸書廢不顯而官府頃罹睦寇又失祥符所頒特抄取計簿益之以里魁亭父之所隱實者編以為冊餘五六十一年矣私竊悼之間因閱前史及國典并雜家稗說有及此者稍稍附著後得祥符圖經於民間則綱目粗設益訪故老求遺事思輯為一書然未果就會邦君趙侯聞之勉使卒業約敕諸曹遇咨輒報且諭屬縣網羅金石之文使得輔成其說而書出矣

夫所為記山川道里者非以示廣遠也務知險易不忘
戒也其錄丁口頃畝非以覽富厚也務察息耗毋繇奪
也其書賦貢物產非以給嗜欲也務裁濶隘同民利也
至於州土沿革吏治得失風俗之媿惡與其人材之衆
寡是皆有微旨必使涉於學者纂之自上世九州之志
與三墳五典偕號為帝王遺書而禹貢職方氏孔子定
之以為經若直抄取計簿以為書則凡吏之善書者足
以次之矣其施於事也亦然若直據令甲以為治則凡

吏之母害者足以聽之矣蓋世常以此為無事乎儒而
儒亦卒不可廢於世也豈特此哉凡十卷名曰新安志
侯帝室之胄父子昆季皆以文學取第其為政廉靖不
擾人亦相與安之且去猶惓惓於吾土思欲表章之蓋
有不可忘者矣淳熙二年三月癸未郡人羅願序

徽為郡自漢始至於今久矣圖經紀述其事宜詳也試
考之則遺闕而不備讀者恨焉此新安志所以作也不
悔昔將承乏此州而吏以圖經先至見其疎略即有意

於補次一日對衆客語之客言新章貢倅羅君蓋志存
於此者訪拾編摩蒐取附益用心勤且舊矣僕為驚喜
因請之卒業成一家書以表見於時於是新安志出焉
上下千載間博采詳摭論正得失皆有據依釐為十卷
凡山川道里之險易丁口頃畝之息耗賦貢物產之闊
狹以至州土吏治風俗人材皆條理錯綜聚見此書曾
無遺者嗚呼可謂盛也羅君以儒學早馳雋聲惟其博
物洽聞故論載甚廣而其敘事又自得立言之法讀者

必能辨之趙不悔序

新安志原序

欽定四庫全書

新安志卷一

宋 羅願 撰

州郡沿革

徽州新安郡軍事禹貢職方氏揚州之南境春秋時屬
吳吳亡屬越越滅屬楚秦并天下置黟歙二縣屬鄣郡
漢武帝元封二年改鄣郡曰丹陽而使都尉分治于歙
成帝鴻嘉二年以黟為廣德王國立中山憲王弟孫雲
客於此三年薨無子地入於漢平帝元始二年復以為

廣德王國立廣川惠王曾孫倫為王傳子赤王莽篡位
貶赤為公明年廢而改黥曰愬鹵光武中興復為黥獻
帝建安十三年吳主孫權遣威武中郎將賀齊定黥欽
分欽為始新新定黎陽休陽并黥欽為六縣遂割於丹
陽置以為新都郡其後避嗣主孫休諱改休陽為海寧
晉武帝太康元年平吳以黥之廣德故國為廣德縣隸
宣城郡

何承天宋志稱廣德漢舊縣沈約以為二漢志並無之疑是吳所立按吳志呂蒙領廣德長吳

錄張純補廣德令則廣德在吳為縣矣然不知所屬至晉書乃顯隸宣城云

改新都郡曰新

安改新定縣曰遂安宋大明八年省黎陽併入海寧止
領縣五梁武帝普通三年割吳郡之壽昌來屬復為六
縣自秦漢鄣丹陽及吳新都晉新安皆隸揚州宋孝建
元年分揚州之會稽東陽新安永嘉臨海五郡為東揚
州自後或併或分梁元帝承聖中分海寧黠歙三縣更
置黎陽合四縣立新寧郡與新安並正屬揚州陳省新
寧郡及黎陽縣而新安復屬東揚州

祥符經云天嘉三年省新寧郡按陳

書天嘉四年以新安新寧八郡置東揚州則三年初未嘗省要是陳省之耳

隋開皇九年改

郡為歙州改始新縣曰新安縣又併遂安及梁所割吳郡壽昌未屬者皆入新安縣以隸婺州於是縣之存者黟歙海寧三縣而州治黟仁壽三年取婺州之新安并復立遂安以隸睦州於是二縣故地迄今不復今嚴州淳安遂安是也大業初復以歙州為新安郡治休寧義寧中治歙武德元年例改郡為州太守為刺史四年越國公納欵於是因其境土以歙州為總管府使持節總管歙宣杭睦婺饒等六州諸軍事未幾改命王雄誕為

使總管欽睦衢三州七年二月例改都督府貞觀元年
罷都督府永徽五年析歙縣置北野縣開元二十八年
正月九日析休寧置婺源縣永嘉元年盜方清陷州
民拒賊保休寧之山險二年賊平因析置歸德縣又以
平方清因其壘析黟及饒州之浮梁置祁門縣又以宣
州旌德寇王萬敵平析歙之古華陽鎮置績溪縣而北
野歸德二縣至大歷五年省於是州復統六縣元和六
年九月升上州自罷督府後或隸揚潤二州或屬浙江

江西道節度及宣歙觀察團練使天祐二年刺史陶雅以楊氏承制拜歙婺衢睦四州都團練觀察處置等使唐亡吳楊氏南唐李氏相繼有之皇朝開寶八年下江南於是始復得共職貢於天子隸江南東路為望宣和三年五月二十四日詔改歙州為徽州

分野

禹貢淮海維揚州周禮東南曰揚州而不言所直之宿漢地理志吳地斗分野也粵地牽牛婺女之分野也而

丹陽等郡盡吳分也郡在漢為丹陽都尉治正當斗分

天文志又云斗江湖牽牛婺女揚州此郡雖於古屬揚州然揚州地廣故特取地理志丹陽郡為據晉書

天文志丹陽郡入斗十六度會稽郡入牛一度按古丹陽歙縣地與會稽之富春接是斗牛之交也自南斗十二度至婺女七度於次為星紀於辰在丑故此郡為星紀丑南斗十六度

風俗

自虞夏以州論風土漢用戰國時封域大者兼星以三

二數連秦漢二十餘郡地廣則論其略後世郡隄則俗亦別新安故秦二縣在山谷間地廣遠自漢世常使丹陽都尉分治於此逮為郡之後吏治益詳又稍割其三陲以為他郡益陘易治然其人自昔特多以材力保捍鄉土為稱其後寢有文士黃巢之亂中原衣冠避地保於此後或去或留俗益嚮文雅宋興則名臣輩出其山挺拔廉厲水悍潔其人多為御史諫官者山限壤隔民不染他俗勤於山伐能寒暑惡衣食女子正潔不淫佚

雖饑歲不鬻妻子山谷民衣冠至百年不變自唐末賦
不屬天子驟增之民則益貧然力作重遷猶瘡於他郡
比年多徙舒池無為界中歛為負郭縣其民之弊好委
人事泥葬隴卜筮至擇吉歲市井列屋猶稍侈其門以
僚吉嚮休寧俗亟多學者山出美材歲聯為梲下淝河
往者多取富女子始生則為植櫛比嫁斬賣以供百用
女以其故或預自蓄藏始秦黥地廣今更為小縣俗淳
儉績溪俗有二由徽嶺以南壤瘠賦重而民貧其北壤

沃賦平人有餘則柔循然愚民嗜儲積至不欲多男恐
子益多而貲分始少蘇公謫為令與民相從為社民甚
樂之其後里中社輒以酒肉饋長吏下及佐史至今五
六十年費益廣更以為病婺源阻五嶺其趨鄱陽徑易
唐末常使總浮梁德興諸縣鹽權且專其兵與鄱通封
疆則民俗近之前世賢吏多表其民之良以為勸祁門
水入於鄱民以茗漆紙木行江西仰其米自給俗重蠶
至熏浴齋潔以飼之此其大凡也賢則察之以施化否

則拂之更歸咎於俗

封建

漢廣德夷王雲客孝景皇帝八世孫別自中山靖王勝中山自靖王五傳絕四十五歲成帝鴻嘉三年六月乃以黔為廣德王國立雲客為王立三年薨諡夷王無子

國除

景十三王傳云復立憲王弟孫利鄉侯子雲客是為廣德夷王諸侯王表云雲客以懷王從父弟子

紹封獨成帝紀載雲客是憲王孫按雲客之祖孝侯安於憲王為弟其父戴侯遊於懷王為從父弟則雲客乃憲王弟孫懷王從父弟子表傳所言是也廣德靜王倫

平帝

紀王子侯表中山靖王傳皆作倫獨廣川惠王傳作孝
瑜顏師古曰音愈諸侯王表又作倫今姑從紀表

景皇帝五世孫別自廣川惠王越

景十三王傳立戴王弟襄隄侯子瑜為廣

德王王子侯表亦言倫是襄隄侯聖之子而諸侯王表乃言倫以戴王子紹封亦當脫一第字廣川自

惠王四傳國除者十五歲平帝元始二年夏四月丁酉

以故廣德國立倫為王秦惠王四年薨諡靜王居攝元

年王赤嗣三年王莽篡位貶為公明年廢

中山靖王傳稱雲客弟廣

漢為廣平王薨無後平帝復立倫為廣德王奉靖王後按諸侯王表廣漢至王莽時猶在安得遽言薨無後此廣德王倫自以廣川系絕故封考之廣川惠王傳可見非續中山也中山子孫侯者二十餘人不應取於見絕

之廣川
明矣

宋新安王子鸞字孝羽孝武皇帝第八子大明四年九月自襄陽改封食邑二千戶母商淑儀有寵子鸞愛冠諸子朝士為上眄遇者莫不入子鸞府國商貴妃薨帝為立寺以新安為號

新安王延年文帝曾孫泰始二年十一月壬辰封紹子鸞後

齊新安王海陵恭王嘗為之以永明十一年十一月辛

亥封邑二千戶

梁新安王瑀字時文明帝子也九歲而封後入隋歷唐至尚書左僕射太宗嘗宴侍臣詔一坐最貴者先把酒長孫房公相顧未言瑀遽引盃上問之對曰臣梁朝天子之子隋朝皇后之弟唐朝宰相天子親家翁上撫掌極歡而罷

陳新安王伯國字牢之文帝第五子天嘉五年八月己

卯封

本紀云封新安郡王然陳以上封王不言郡蓋衍文

唐新安郡王徽太宗皇帝之孫濮恭王泰之子

新安郡王侑玄宗皇帝之孫信王瑄之長子

新安郡王訢代宗皇帝之孫嘉王運之子正元四年四

月封官太僕卿

新安郡王洙憲宗皇帝之孫絳王悟之長子太和八年

十一月封

右十一王皆以天子骨肉疏封唯漢廣德兩王實建國
於此餘或采美名以為號不皆之國然漢魏以下王不

之國朝廷命卿大夫臨郡則稱內史行郡事故東晉謝靈運王羲之為會稽臨川內史南朝亦往往有新安內史是郡猶為國而內史特代王為治名號猶係於其民也故采而列之偽楚亦常以桓冲之子謙唐武氏亦常以武三思之子崇烈為新安王皆假竊名器不足汗簡牘至唐潁王子憚封歙國公汾州刺史王詮封歙縣男之類蓋自鄆以下者微不復道也

境土

郡境在京師之東南統縣六曰歙曰休寧曰祁門曰婺源曰績溪曰黟始漢末以古黟歙二縣分為新都郡地廣大後又稍稍割之蓋古歙縣地之在今者為歙為休寧為績溪為婺源為嚴州之淳安為遂安古黟縣地之在今者為黟為祁門為廣德軍之廣德為建平凡三郡十縣今所存者唐歙州新安郡之境而已非復漢之新都也然在唐猶號大州凡東西廣長四百一十九里南北二百八十二里

治所

始漢建安中置新都郡立府於始新今嚴州淳安縣治

是也其後薦割以隸婺睦於是隋歙州始治黟

酈道元水經注

云吳立始新都尉於歙之華鄉令賀齊守之後移出新亭按華鄉即始新縣華一作葉而賀齊乃新都都尉言

始新都尉者誤也但新亭不知所在

大業中遷治休寧萬歲山義寧中遷

歙縣烏聊山唐及國朝因之宣和三年睦寇方臘既平

部使者遷其城於溪北三里民不以為便事聞會除盧

宗原為守有詔同徐閔中相度宗原以為新城地形不

正周四里有餘北皆重山纔能為三門距溪數里茶鹽
載卸者弗便瀕澗卑濕為壘善崩截山圍築外高內庫
瞰臨城中又無濠塹不足以為固內之則頑石岡隴虛
占其半峻嶒峻仄不可以建居止餘皆荒草砂礫之地
夏秋山水暴出灌注城內雨雪則停潦為泥鹽米斷絕
又頑石不可為井土井六七味惡易濁汲溪則人以為
苦民以其故不願舊城據山下平原大勢端正周七里
三十步左有長溪春冬水面二十丈夏秋濶一里許湍

流百尺循城西南而下便於載卸其右則倚山為城亦
臨深溪繞城東北不可踰越市皆甃甃民居寬廣井泉
且千所向特以城壁不全故不能守今若因故基修築
足為險固以此民情願還得旨以舊城為州以新城為
歙縣且令以漸修築而新城亦卒不為縣今民間猶號
新州宗原城舊州畢明年八月與士民復歸于舊州

城社

城壁之設因山谿以為險山起於東北至南而止故因

而續之以為城谿亦源於東北抱城而轉至西南而下故假之以為隍乃穿九井使陰相灌輸上通銅井下通釜底皆谿流之深為潭者也其外羅城周四里二步高一丈二尺子城周一里四十二步高一丈八尺廣一丈三尺五寸唐大中九年修子城中和三年又修羅城至五年增廣城之南北總之為九里七步咸通六年即城之西北為隄以禦水光化中因隄築為城命曰新城自南唐及國朝無所考宣和中既平睦寇詔盧公修築乃

計其工費聞於朝為羅城如唐中和五年之制然其地
在今僅號七里三十步乃啓六門東西則一南北各二
有富州豐樂表城紫陽通濟太平之名門皆有樓又環
以敵樓不復為子城而於儀門外直南數十百步為譙
樓面勢雄正其外為宣詔班春之亭先是譙樓在東故
常穿州治之東廂以出既南作新譙乃以舊譙基在東
者為門號迎和門五年春三月城既訖役奏乞令知道
都監季申部仕者任滿以相付書於歷底幾勿壞且奏

其屬功於朝改轉各有差又往往即大輒隱起為文凡百餘言以戒後之人使毋忘寇難壞則修之其光化中因隄而築號新城者隄既益摧遇谿水溢時高於平地二三丈故常捐之以為桑野今號新城園紹興二十年火災市人以為承平時譙門東出則城中列肆不耗士子登第者衆乃遷州榜及鼓角於迎和樓而虛南向譙樓不用乾道八年夏五月前趙侯集六縣各新沿城一門而州則恢度東南譙樓既具費及今趙侯成之而城

樓在西者其旁為一丈夫巖立金花帽錦袍持弓矢引
滿以射西方號蘭將軍如是古矣按蘭將軍名亮歙縣
人隋開皇九年平陳併黠歙入海寧以隸婺州廢歙州
為新安鎮以亮為將主之蓋前則接平陳之役後則接
大業之亂此其人必嘗緩帶登陴以弓矢靖難有功於
斯人者故歷唐以來設之不廢社在城之南隅

道路

趨京之軌道出東門指績溪由寧國縣入其府濟黃池

入太平州渡采石江歷和州及其縣全椒滁州及其縣
來安泗州及其縣臨淮自虹靈壁以入于宿取亳之永
城南京之穀熟入南京過寧陵拱州以達于雍邱陳留
至京門為二千六十五里捷則北出踰箬嶺望道泰麻
村凡百九十里得寧國府之太平縣歷黃柏嶺曹店凡
二百里得池州之大通鎮過江歷蔡家店石鼻村百三
十五里得無為軍之廬江縣又百四十五里自航步入
廬州又歷下塘廟史源村凡二百五十里至壽州又自

蘇村闕潭村王家市賢祥村金鉤鎮雙樓市凡四百二十里以入為亳之鹿邑縣又七十里則太康縣矣經咸平縣凡百九十里以入于京門為千六百里此其道往往不過都歷邑者商旅之所以為徑易也舟行自西門汎谿勝二百石沿新安江而下百二十里以出於境由淳安至嚴州歷桐廬富陽過浙江入臨安府又經崇德至秀州經吳江至平江府經無錫至常州經丹陽至鎮江過揚子江至揚州高郵軍經寶應至楚州歷淮陰虹

靈璧三縣至宿州歷永城穀熟至于南京經寧陵至拱
州以達于雍邱陳留入京門為三千九十二里今茲趨
行在所者舟行六百三十里陸行則南出歷昌化於潛
臨安餘杭為三百六十里其四出八達之道東出百里
至于境又二百二十五里至寧國府西出二百七十里
至于境又三百三十里至饒州南出百里至于境又二
百六十里至臨安府北出七十五里至于境又二百八
十五里至池州東南出百里至于境又二百四十里至

廣德軍西南百五里至于境又二百五十五里至嚴州
東北百里至于境又四百六十五里至池州西北二百
七十里至于境又七百五十里至闕州闕

戶口

吳新都郡不載戶口之數晉新安郡統縣六戶五千宋
統縣五戶一萬二千五十八口三萬六千六百五十一
隋歙州統縣三戶六千一百五十四唐舊領縣三戶六
千二十一口二萬六千六百一十七天寶領縣五戶三

萬八千三百二十口二十六萬九千一百九永泰元年
冬十月丁亥分宣歙饒戶口於秋浦縣置池州國朝天
禧中主戶十二萬一千一百五十口十八萬三千五百二
十八客戶六千九十八口八千七百六十四其每縣主
客之數各附其縣中元豐中主戶十萬三千一百一十
六客戶二千八百二十八未經界戶十六萬一千一百
四十七

此經界時所具祖額不的知何年

經界戶九萬七千二百四十

八乾道八年諸縣主戶十一萬二千五百九十五客戶

七千四百八十八合以城內外戶一千九百三十一總
為十二萬二千一十四然自元豐以後不言口數要以
郡境土較之狹於晉宋五之二以戶口率之多於前代
不可勝計有以見國家世世仁厚涵養生齒之效其在
郡城中者乾道戶千二百八十一口六千八百五十八
城外戶六百五十口三千二百八十一廳為可考凡六
縣民去為僧尼者千有二人為道士者四十六人

姓氏

諫氏元和姓纂云周禮有司諫子孫以官為氏漢有治書御史諫忠見風俗通今望出歙郡

余氏風俗通曰戎人由余之後世居歙州新安及下邳汪氏古諸侯汪芒氏之裔春秋時魯有汪錡以童子死齊師聖人稱之唐歙州刺史汪華居新安故望出新安今歙歙之人十姓九汪皆華後也陳稷州刺史汪綱陳亡自歙州徙河間故又有河間汪氏右鄧名世姓氏辨證云耳按汪芒氏之裔在周為長狄與常人不類獨祖

汪錡者近是然鄧名世以為汪王所居新安而又言陳世汪網自歙州徙河間則是由陳以上固有居新安者矣姑著其說以待知者

仰氏五代有仰仁詮為刺史千姓編云今新安吳興皆有此姓

聶氏元和姓纂曰衛大夫食采於聶因以為氏辨證云望出河東及新安

查氏顯於文徽為南唐樞密使至國朝祕監陶待制道

皆其孫也本音如乘槎之槎

鋤加切

真宗嘗與道語及姓

氏因謂之曰卿豈不聞京師以忤作行人為槎家乎宜求音之近而雅者稱之又問姓所起引春秋會吳于柞

在加切

以對自是改稱音若祖云查氏有孫藻仲文在荆

南廣覽好文自言其上世事如此隆興中侍郎郭薦乃其兄子也凡海陵荆南之查皆出新安姓氏之書又往往載呂氏俞氏皆郡之先賢然不言望出此郡又自昔喪亂中原衣冠多避地來此如謝諫議泌晉太傅二十

七世孫魏太尉羽去鄭公十世許司封逖去睢陽太守
五世皆自見其事中不列於此

潛氏縣有潛氏村昔有人避地家石洞中門徑悉為松
蘿所翳每求鹽米晨出夕還人無知者時人號為潛氏
迄今潛姓者數十家同為一村

坊市

坊舊十有二曰宣化曰望僊曰紫陽曰興仁曰化成曰
問政曰增明曰和福曰司晨曰通濟曰育材曰安集乾

道中尚書郎錢侯數因民剗肝股為增立坊曰孝童孝義之屬今往往有存者

官府

州衙在子城之西北正南曰設廳防守庫在東廂之樓甲仗庫在西廂之樓儀門在其南軍資庫公使酒庫分為左右在儀門之南又南則舊譙樓在焉宣詔班春二亭在譙樓之南設廳之右為小廳小廳之前為簽廳自餘賓次吏舍如他州之儀皆宣和中盧徽猷所建其堂

房之外有紫翠樓有靜治燕香之堂先是累數守以正堂為不利避弗居至丞相洪公乃敞之以御賓客致尊賢之意號舍蓋堂而自唐大中以來有黃山樓北望天都諸峯國朝咸平中集賢李學士復踞城西北隅建清心閣宣和後皆以次起廢而黃山樓亦踞城為之號黃山堂堂側有兩古木洪公常作亭其間號浮丘今雖廢民猶指其處又改後圃雙杏堂曰芙蓉堂舊別有四寶堂以郡出文房四物為義

通判軍州事一員諸州置通判自建隆四年始陳恭公安定先生皆嘗來為此官廳在州衙東舊有棣華堂宣和中吳郡李彌綸兄弟繼踵故名

州學教授一員廳在州學之南

軍事判官一員咸平中魯肅簡公嘗為之廳在紫陽坊軍事推官一員廳在判官廳之側

兵馬都監一員廳在司晨坊教場之側

添差兵馬都監一員廳在通濟坊

兵馬監押一員廳在孝義坊

錄事參軍一員熙寧三年十一月十九日詔陝府江寧府鄆青齊杭越蘇婺宿壽宣歙虔洪吉潭廣福建等州錄事參軍係繁難去處今後並差職官知縣及奏舉縣令人充其料錢數多資序不該請者並支錢十五千廳在州院之側

司理參軍一員五代時諸州馬步院判官特以牙校充選建隆中改馬步院為司寇置參軍以及第進士九經

五經并在銓選人為之其後改曰司理廳在本院之側
司法參軍一員廳在慈孝坊
司戶參軍一員廳在和福坊
監在城酒稅一員僦居無定處

廟學

先聖廟及學自唐至國朝在城之東北隅太平興國三
年知州蘇補闕遷羅城東門之內街之南烏聊山上景
德三年嘗修之嘉祐四年以山高地狹不足容衆徙於

南園熙寧四年又以南園瀕江地卑常有泛溢之患復遷烏聊元祐初再徙南園紹聖二年黃朝散還之於東北隅米禮部芾為書所為記世所傳欽州新學記是也宣和中焚于睦寇紹興十一年汪內相始復營建左廟右學規制雄麗愈於他郡中設知新堂闢八齋以處學者曰殖齋懋齋益齋裕齋毓齋定齋覺齋浩齋紹興中藏御書周易尚書毛詩周官中庸春秋左氏傳論語孝經孟子樂毅論羊祐傳并法帖御製文宣王贊七十二

子贊損齋記凡四十八卷

貢院

貢院自宣和後不復設遇歲大比則毀學之齋壁以納之坐講堂及廟兩廡皆滿乾道四年郊侯規大成殿之東故閑地增買民地六百二十餘丈為屋東西八十間長廊廣廈使士各以其藝別為位最後則堂以處較藝者自是學舍無毀撤之患士得去此隘盡思於為文且以稱登能天府之意餘所買地頗當廟學前者皆虛之

又盡撤學前小屋直南而出以達于達氣象宏敞是秋
遂以試進士明年登第者十人有為禮部第一御試第
三人者士子宜之

放生池

國朝因唐之制天禧元年詔淮南江浙荆湖舊放生池
廢者悉興之元無池處沿江淮州軍近城上下各五里
並禁採捕紹興十三年詔天下郡各為池而歲以誕聖
日縱魚鼈其中以網罟入者論如盜於是郡鑿城西孺

地以應詔至十八年尚書郎章侯增廣之作恩波堂好
生魚樂之亭後十數年屋為溪潦蕩去尚書郎錢侯復
新其堂而池當春夏往往與溪匯冬月水泉縮魚無所
賴乾道八年祕閣趙侯徙堂於其右百步篁竹中亢爽
之地而臨溪流以放生如天禧故事

館驛

轉運南行衙在慈孝坊

北行衙在司晨坊

新安驛在通濟坊

倉庫

州倉在孝義坊

常平倉在州倉之側

酒稅務在市心面南

公使庫在州治小廳前

醋庫在城東門外

舊有茶倉草場楮場之屬今皆無有

刑獄

州院在司晨坊面東司理院在司晨坊面西大中祥符二年五月饒欽二州奏獄空將降詔獎諭銀臺司以為州司司理院互有獄空不應編勅之文自今乞委刑部點勘旬奏禁狀不謬者具奏降詔從之

營寨

祥符中有駐泊營屯駐營各二水軍營騎射保節營及新舊牢城營各一今所管廂禁軍凡六指揮禁軍威果營在城東北隅額管四百一十人忠節在西南隅額三

百一十人武雄亦在東北隅二百五十七人廂軍效勇
在東北隅一百五十人牢城在西北隅百五十人壯城
在西南隅百人其起置不可盡考按皇祐五年閏七月
詔淮南江東東西荆湖南北路諸州軍新立就糧禁軍
教閱忠節軍大州五百小州三百人其額在舊忠節之
下新忠節之上則忠節之制久矣嘉祐四年五月詔江
寧等諸帥府新招禁軍以威果為額請受如宣毅例每
指揮不得過四百人諸州置威果當沿此而始熙寧二

年正月樞密院檢會近令淮南江南兩浙福建等路將
廂軍團結教閱武藝欲支與威邊請受以州軍小大立
定人數自三百人至百人仍改軍額內江南曰武雄從
之蓋其可考者如此其外五寨管界寨在歙縣西百八
十步王千寨在歙縣東南百里黃山寨在歙縣北百里
深渡寨在歙縣南四十五里中平寨在婺源縣東七十
里每寨百人皆以巡檢主之凡禁軍九百七十七人廂
軍四百寨兵五百總之為千八百七十七人

郵傳

五代以來天下郵傳皆役平民建隆二年始命以軍人代之六縣省遞三十五鋪每鋪十人歛休寧祁門黟則又有斥堠三十八鋪每鋪八人凡六百五十四人

祠廟

新安之神諱華姓汪氏績溪人隋將寶歡之從子少以勇俠聞大業之亂以土豪應郡募平婺源寇有功尋為衆所推保據郡境時四方割據建號者衆乃稍以兵取

旁郡并有宣杭睦婺饒五州帶中十萬建號吳王為政
明信遠近愛慕部內賴以安全凡十餘年唐武德四年
以籍土地兵民遣使納款于唐高祖嘉之制曰汪某往
因離亂保據州鄉鎮靜一隅以待寧晏識機慕化遠送
款誠宜從褒寵授以方牧可使持節總管歙宣杭睦婺
饒等六州諸軍事歙州刺史上柱國封越國公食邑三
千戶七年朝于京師貞觀二年授左衛白渠府統軍事
參掌禁兵十七年改忠武將軍行右積福府折衝都尉

太宗征遼東為九宮留守比還稱其忠勤二十二年三月三日薨于長安永徽中歸葬歙縣北七里雲郎山郡人思慕立祠於刺史宅西偏大歷中遷于烏聊山號越國公汪王神自唐刺史薛邕范傳正相繼增葺他縣亦處處有祠及國朝東封秩羣祀郡人方演知州事上唐所賜誥命為奏請追封靈惠公政和四年三月賜廟號忠顯七年十二月封英濟王宣和四年以陰相平睦寇加顯靈隆興二年閏十一月以能禦災厲加信順乾道

四年三月進封信順顯靈英濟廣惠王夫人錢氏唐左
武衛大將軍九隴之女乾道五年六月追封靈惠夫人
新唐書本紀王以武德四年九月甲子歸唐而杜伏威
傳及王雄誕傳乃載王與雄誕戰覽者因以為先戰後
服以資治通鑑考之王九月歸唐十一月自與伏威將
雄誕戰是時王與伏威皆已受唐命戰自其私忿非因
戰之後始歸唐也按唐告稱其識機慕化遠送款誠則
是王自知天命非戰而後服明矣今唐告見存其辭則
李百藥顏師古所作可以考信故國朝賜廟額父子並稱忠云王有八子舊稱八郎君
紹興十年賜廟號忠助乾道九年正月咸賜侯爵建仕
唐為朗州都督府法曹賜封忠惠侯璵費州涪川令封

忠利侯達以征荷魯龜茲高昌功爵上柱國襲封越國公封忠應侯廣遜皆左衛勳府飛騎尉廣封忠濟侯遜封忠澤侯達薛王府戶曹封忠仁侯爽岐王府法曹封忠德侯俊鄭王府參軍封忠祐侯而忠顯廟之前則有岱岳廟後有城隍廟城隍在唐世州縣往往有之李陽冰以為祀典所無吳越則有至開成中睦州刺史呂述以為合於禮之八蜡祭坊於水庸者是亦近矣烏聊東峯又有靈順廟其神五人皆封公事見婺源縣卷中而

近歲民間又祀孚惠廟本出於信州傳云神石敬純東
晉時人前趙之從子為父報讐山為震鳴故信州人祀
之本朝封至八字王焉

附汪王廟考實

王諱

行狀云王諱世華避唐太宗諱去上字按初封告在
武德中無所謂世字雖秦王威望素隆然王以稱孤
之餘方為國屈不應於此時諱諸王二名而預為之
避也考一時歸唐者如王世充李世勣皆無所省世
勣在貞觀時猶復如故至高宗初即位有司請改官
制中有治字者以避上名高宗以貞觀時不諱先帝
二字詔之有司奏曰先帝二名禮不偏諱上既單名
臣子不合指斥以此知未嘗偏諱也後改民部與昏

葉等字及世勛之為勛皆在高宗時諱親之典安有當貞觀時為人主則不諱而在武德時纔為藩王人反為避哉然今相傳云王有二弟世英世榮或曰初實二名既貴自欲從省要不為唐諱設也

姓氏

氏族之書皆以汪姓出汪罔氏亦曰汪芒孔子所謂漆姓守封嶠之山者在虞夏商為汪罔氏於周為長狄於春秋時為大人又海外西山經有汪野李善以為汪氏國在西北海外然則汪罔其氏而汪野其國也顧所居距中國遼遠而哀公時魯乃有汪錡者以死齊難為聖人所褒故內翰汪公誌其宗人司城墓推姓所起亦先本汪罔又採或說云汪姬姓也魯成公支子食采於汪因氏焉汪罔之汪見於傳記而姬姓之汪特出於今里中所傳故內翰兩存之竊嘗以汪罔之人世皆長大號十倍焦僥氏在春秋間蓋嘗至矣兄弟四人各適一國以死其適魯者曰僑如魯之

亞卿以名其子而太史又志其藏以為異也然則所謂汪罔之後者何從而容於魯乎藉令在魯已傳數世其質尚當與常人異孔子之答吳客何至近捨本國之汪而遠稱封嵎之長狄大人以為證耶春秋正義亦引蘇氏云國語稱大人者屏居夷狄不在中國由此觀之謂汪氏為諸侯之裔似稍近人情至俗所傳譜自成公以下有一世某二世某云者仍其舊而言也

行狀稱漢州望

建安二年龍驤將軍文和為會稽令因世

亂避地家於新安文和之名他書無所見沈約宋書云龍驤將軍晉武帝始以王濬居之然則自濬之前安得有此官也近世臨川鄧名世作姓氏辨證言王始居新安故望出新安今歙歙之人十姓九汪皆王後也又云陳稷州刺史汪綱陳亡自歙州徙河間故又有河間汪氏按綱之由新安徙既在陳時則汪氏

之居此舊矣豈得言自王始乎太平興國中有為王廟記者言王乃隋將寶歡之族子或謂陳隋以上始處此邪本之龍驤則荒遠就王為說則簡陋俱未適中故內翰至此略而不言若以新安之族由王而望始著則可爾

境土

行狀所載王事出於故老所傳凡有初起假奇怪以動人者不暇決擇然其本末猶得以粗見承議汪公所作傳特為整潔至王師正刑略太甚師正他郡人不深為稽考務欲每事貶損如言兵則云得數千人言地則云據郡以守夫以數千人守一列郡而遽建號雖妄庸不為也方隋亡時蠡起之將不可勝數其以姓名載於唐新書本紀之首者四十有八人王之名在十數人之中此非小弱也功濟六州之民而心識天命所在亦豈可忽哉史之所書雖略然資治通鑑載王據黔歙等五州有衆一萬則與行狀及江傳

所書略相類矣唐之命王以六州蓋因其所有就畀以節不然王特以一州內附唐何所利復割他郡附益之哉然云五州猶有未合者蓋通鑑特載於歸附之日豈疆場之設一彼一此在當時存者五州歟抑欲言據點歟外復有五州致略其文歟較其實則所謂六州者蓋皆嘗有之不可掩也至於兵之多寡則據一時籍獻之數容有罷歸者通鑑及新書又言王甲兵甚銳夫以銳兵而數至一萬則餘卒固不止此矣豈若師正之云者哉

治所

新安郡治自昔屢遷今治歙縣烏聊山之西則實始於王烏聊者郡之形勝自漢建安之亂縣人毛甘以萬戶守之逮王之起復屯其上後因遷治其旁云而行狀及傳乃言王初起時以箭所下處立城指績溪縣東之祠為其故處按今績溪雖有故城而圖經載隋開皇十一年州治黟大業中為郡治休寧義寧中

治歙縣之烏聊山義寧所治非王孰始之其城於績溪當是草創營壘其後卒遷今治爾此王所規畫故表之

納款

願嘗以王廟食此邦踰五百年而民愛敬之久而愈新者不惟能出雲雨禦災厲亦由其起不失正道始終出於靖民故天下方亂則以身蔽六州之人及其粗定間真王而遂歸之事合天心為天所相是以生享其祚而沒食其土以能悠久然則不闕一民不煩一旅間闕自託於唐者乃王之大節本意不可以不白也今武德告命具存所以褒表者其語明甚而舊書本紀不著歸唐月日新紀雖於武德四年九月甲子書降至列傳杜伏威遣王雄誕來伐又不著其已受唐命反更追書稱王時事遂使覽者徒見紀傳所誕以天子之命來討力窮勢蹙至是始降爾則與告

命所謂遠送歟誠者豈不相戾邪蓋雄誕來伐雖亦以此年然王送唐歟實先之所謂九月甲子者月九日也告命以此月二十二日下則歟之至唐與其封拜皆不出九月中而雄誕之來乃在是冬謹按資治通鑑王遣使歸唐載於九月而雄誕來伐別載於十一月則是歸唐之後已受封拜而伏威雄誕自以私意伐之爾是時伏威之於唐未為純臣王之歸唐也必思以忠自列恥因之以成事故籍其土地兵民遣使間道越伏威之境以歸之天子意伏威之黨相與竊議疾王歸唐之事不出於已因襲之以為已功此淮陰擊已降之類初不害王之先識也若夫王之屈於伏威雖出於不得已然彼方以行臺自名而雄誕實左右之吾為唐行臺屈爾肯遽出其下哉說者又以雄誕既戰之後唐室以其前後功亦除歙州總管管歙睦衢三州疑若右雄誕者不知唐於此時亦未能全制東南來者斯受之爾王既以六州自歸則因

以六州界王建伏威自以行臺而襲王為已功唐亦
不得而却也此正淮陰之事也豈天子亦欲見王而
為之遣代邪故未幾遊朝于京師嘗試考王歸附之
初高祖以大國重使見處與其一時褒崇之語及貞
觀之間典宿衛者二十年太宗遠伐委之莞鑰非風
嘉其節而深信其心何以及此告命所表雖漢甲令
稱忠殆不若此之明也不考此而云云豈不誤哉

官閤

王入唐除左衛白渠府統軍及忠武將軍行右衛積
福府折衝都尉及九宮留守按六典左右衛有諸曹
及親勳翊五府及武安武成等五十府所謂白渠積
福蓋五十府之列也始武德初依開皇舊名置驃騎
將軍以掌府衛七年改為統軍後又採隋折衝之名
改統軍為折衝都尉然則統軍及折衝一官也忠武
將軍者與冠軍雲麾等凡十將軍謂之散號將軍以
為加官具有職事則高者為守卑者為行此於官帶

行字者忠武正四品上折衝乃統軍所改統軍正四品下故也然自始封國公則已在一品矣九宮留守亦環衛官

夫人

行狀及傳皆云夫人錢氏唐功臣九隴之女按九隴家世雖本東南人然以新舊書考之自其父在陳時為隋所獲沒入為隸故九隴事唐公以善騎射常置左右則錢氏當隋初已在太原兩家方微不應涉千里而聘若王入唐始婚則王以隋開皇六年生至武德五年年三十有七矣中間稱王十餘歲亦不應未

有配偶又丞相汪公云王以六州所興提挈八子歸諸朝天子嘉其忠封越國公命諸子班環衛則王未入朝之先已有八子矣計錢夫人之前容有夫人逸其姓氏者以其時考之當如是不敢臆斷也諸子名位既大抵出於入朝一時恩命則歷官皆不當止此而王之胄嗣亦將不止於八今自歆及杭睦間往往

祀所謂汪九郎者云王之幼子豈錢氏之出歟抑在八子之中而其羣從相與為次第故至九歟當以待知者

廟貌

汪台符廟記稱貞觀二十三年父老請建祠堂於廳事之西大歷十年刺史薛邕遷于烏聊東峯元和三年刺史范傳正又遷于南阜即今廟是也中和四年刺史吳國克荷冥應復新棟宇按今烏聊山之祠相傳云邕嘗以王功德奏聞奉勅立廟然必於山者則以王初起嘗駐兵其上故也山起州之東北而極於南所謂東峯者今人別謂之東山所謂南阜者即此山之最高處今人呼為廟山薛邕者蒲州汾陰人高宗相元起之曾孫有宰相望為吏部侍郎典選大歷九年五月乙酉坐事貶歙州刺史范傳正鄧州順陽人自比部員外郎出為刺史尋歷蘇湖皆以政事修理間舊史在良吏傳中吳岡之名不見於史今歙

縣士人汪德符藏其所補十將鄭禎兩牒乃光啓元年三年所給也圓中和四年在郡明年改元光啓其褒禎詞略云登陴將匝於星灰禦侮頗勞於蚤夜當是時秦彥逐宣歙觀察使竇滔而陳晟逐睦州刺史韋諸四封方撥捍禦之事蓋無歲無之所謂冥應者必嘗控王以求助而感其陰相也圖仕使檢校右散騎常侍兼御史大夫

碑記

汪台符記唐末所作時楊行密有江淮其將陶雅實守此郡記所稱僖皇歲庚子盜起曹南者黃巢也淮王弘農公者王則行密嘗封淮南王而公則其子渥也司空潯陽公者雅也行密以景福二年八月取歙州逐唐刺史裴樞自池州召雅既修廟又嘗崇王墓而垣之復立石人石獸之屬雅在郡凡二十餘年龍集壬戌者昭宗天復二年也自始至此蓋十年矣台符本郡人好學力耕號有霸才宋齊邱忌而殺之江南

欽定四庫全書

卷一

野史有傳

從祀

今所在王廟有二武士介而兵立於門首土人謂之
毛甘將軍汪節將軍毛甘者歙縣人漢建安之亂率
衆保烏聊為吳將賀齊所破因此置新都郡事見吳
志汪節者績溪人唐神策將軍家在大徽村其母嘗
避瘡於村西福田寺外感於金剛神已而生節及壯
有神力長安東渭橋石獸重千斤節獨徙置之又能
負石碾碾上以木架牀設龜茲樂一部曲終略無難
色德宗甚加寵異事見太平廣記所引歙州圖經
今不復載矣二人與王雖異世民間特以有功及材
武故類而祀之又廟中有繪宣城長史淮安長史云
者或曰即王二佐天璫鐵佛入唐所得官
右考實之文先是郡太守郊公精意在民禱王必
應政成欲傳廣其威靈得告命於官府得詩文於
金石復訪求遺事於是州之人士及耆老王實輩

各致所聞既已詮次願於公辱禮聞知己之分竊
從假觀之亦欲一出意見而卷帙既定方亟於攻
本不敢有所動搖獨念王歸唐大節自我先侯及
丞相內翰兩汪公今致政尚書金公皆有翰墨力
為發明輒復考其款附月日與王雄誕戰伐先後
漸以益信前說說始萌芽又旁訂凡語及王者十
一事以備採擇考實辨疑先侯詩語也故本之乾
道五年九月朔州民羅願述

新安志卷一

欽定四庫全書

新安志卷二

宋 羅願 撰

叙物產

生人之道致物以為養物備則養豐養豐則生足樂生足樂則喜為善喜為善則重犯法重犯法則服教訓服教訓則上尊安故古公與其妻胥宇味其董荼則以知周原之美而蹶父為其女相攸覽其有川澤魴鱖熊羆猫虎則以為韓土之樂然則物產之所聚是良國也雖

然有道蓋所謂穀與魚鼈不可勝食而材木不可勝用者亦繫於其政

穀粟

新安之穀大率宜秔而不甚宜秔土人謂秔為小米秔為大米具秔有大白歸生小白歸生又有紅歸生米粒紅成熟最早然不廣種少蒔以接糧耳有桃花紅者穀粒微紅而米粒正白亦先熟古太守秩之任昉去郡唯有桃花米二十石是也太平寰宇志云今休寧縣尤多

為飯香軟又有冷水白有筆頭白稊端少許不生穀如
筆之象有肥田跂大率秔不耐肥唯此種能於肥田中
自植立也有早十日有中歸生又有晚歸生近八月社
熟米色不甚鮮明占禾本出於占城國其種宜旱大中
祥符五年詔遣使福建取三萬斛并出種法而布之江
淮浙之間亦曰旱稻秔有大粟黃亦名硬稈粟黃有小
粟黃此二種有常不至瘁有蘆黃遇熟則顆粒多往往
倍收故一名富不覺然不熟亦連畎皆死珠子稻顆圓

如珠烏鬚稻芒正黑有婺州青其來自婺州有葉裏青

其長没人揆

色青切

皆藏葉中有斧腦白有赤芒稻並早

而易成偕號為六十日然不叢茂人不多種有九里香
亦名五里香有馬頭紅穀粒紅而米白亦有香然稈厚
米少有萬年陳其色如糯有沙田白有寒青寒青最遲
糯有青稈羊脂白矮之名白矮釀之多得酒有牛蟲糯
顆粒大難為地力價高於白糯有早歸生盡六月可熟
有交秋糯七月熟米亦好釀之可以及社節然無叢箭

其粒赤而長故又名金釵糯有秧田糯善耐肥蒔之早者亦可及社大麥則有早麥中期麥青光麥又有高麗麥亦呼高頭麥揆之則粒出然難為地力有糯麥宜為飯小麥則有長穰麥麩厚而麵少白麥麵白亦少赤殼麥麩薄而麵多蕎麥姿荏弱榦赤花白不類他麥秋種而冬食火麻則有早晚中期三色又有梅麻梅雨後始可拔其油麻則有白麻早成有赤殼麻或落地自生多變為大炭麻又有六合麻圓而六稜凡菽芋菜草子皆

有膏油但可照灼至服食須麻膏豆有大白小白大紫小紫大黑小黑褐豆大青而黑者為豉極良有油綠豆視綠豆尤小宜為粉有紅斑沙豆大如綠豆羊角豆纖而長褊豆者大莢實籬上豆也實或白或黑龍牙豆者大如阜莢又有豌豆秋豆尾秋豆尾秋一名米豆可雜粳為飯粟則有早粟寒粟寒者晚也有毛粟成亦晚有薑葉赤者無芒又有赤稗白稗有望粳青有糯粟山人以為酒則味澁而不清令人善醒有罌子粟結房如

餅罌如鶻箭華艷好而實細美非他粟之類其稌有三
黑稌者私稌也赤稌者糯稌也私糯本稻之名私瘠而
糯腴故稌粟之類借此以別之二稌皆長大如蘆故俱
號蘆稌紅黃稌則低小格以古則私秔稻也糯稌也大
麥小麥來麴也大麻蕒也油麻胡麻也豆菽也粟梁也
古者米帶稗皆謂之粟梁之粟尤小故後世直以為梁
之名也稌稷也音之變也

蔬茹

蔬亞於穀故后稷能殖百穀百蔬而蔬不熟之歲為饑然則此不錄至五穀又只載其總名而獨錄草木之華非為政之急蔬之美者有石上之芥焉細者益辛薑薺芹芥辛菜也葱薺韭蒜葷菜也芹生竹中曰竹芹生水曰水芹蒜之大者曰胡蒜自西域來者也蓼蕎氣葷如小蒜而長本草以為乳婦食之良蘭香羅勒也避石勒名世稱蘭香胡荽亦諱言胡故稱圓荽又有芸薹此皆蔬之同臭味者也苜蓿者漢離宮所殖其上常有兩

葉丹紅結穠如稊率實一斗者舂之為米五升亦有私
有穠私者唯以作飯須熟食之稍冷則堅凝穠者可搏
以為餌土人謂之灰粟軍達頗稜唐世自外國來者也
頗稜以所出之國為名胡蘆服甘而不快於口蘆服則
土人雜香菜以為菹百合似蒜而不葷鼠黏之根為牛
旁芋即蹲鴟預藥似諸葢嘗以為貢唐世諱預至本朝
治平間復諱其上字今謂之山藥芡首者菰根是也茵
之為物美而類甚多或能殺人亦使人善笑其最下者

曰麥熟菌所謂軟濕青紅者也木耳者古燕豆之芝也石耳生大山之崖山羊所不能緣也垂綆以取之地蠶者澤蘭根也肥白而促節大如三眠蠶以冬掘取之亦曰地筍也蒟蒻者黃獨是也以灰鬻之歛人所用為喪食也葛則饑歲掘取其粉蒸之以接糧枸杞詩之芑也芡味苦說文所謂江南食以降氣者也土人搏粉為餌假以為色青綠而可喜菰菜其味甜也周花蔓生而穗略如豆花香蒿所以點食為香也蘇所以煮飲為香也

決明明目至莖則損矣苦蕒苦莖也苦蕒花如菊菊甘而蕒苦故諺曰苦如蕒也蔓菲以芼雉羹及馬蘭繁縷薺莧藜蕨皆物之旅生者貧者所資也藜赤莖而多枝利以為帚亦曰獨掃蕒似苜蓿而青白陸德明以為蕒所謂堇荼如飴者土人謂之灰蕒徒弔切瓠甘瓠也瓜有所謂堇荼如飴者土人謂之灰蕒

胡瓜越瓜有崑崙之瓜崑崙瓜者茄之別名其色有如銀者

藥物

庶草之繁廡其施於藥餌者芝蘭芍藥兔絲昌羊昌羊
石生而細者為昌蒲大觀中繪本草未所出之州七歙
與一馬陳藏器以為麥門冬出江寧者小而潤出新安
者大而白陶隱居以黃連出西間者色淺而虛不及東
陽新安諸縣掌禹錫又以為香葉壽春及新安有之石
上生者莖葉細而尤辛香用之益佳彼人謂之石香薷
此見於前載者也火杓狶簽也香附子者莎根是也薤
珠者薤苢馬援所載者也篇竹射干也蝦蟆衣者車前

車前菜也蒼耳卷耳也陵霄緣高林絕壁而為華所謂茗之華也羊蹄秃菜也言采其苗者也樟柳者當陸所謂莧陸夬夬者也三白之草土人為之五葉白始生而青入夏則葉轉而為白田家候之每三葉白時農事亟矣五葉皆白則農者益閑至秋皆復青金罌結實如餅罌味甘澀霜後取之以熬糖又取甜藤以代飴菰莢之根亦用藏鳧子亦曰金剛藤旁具先歲七日採其枝葉插門戶以禦厲土人謂之旁皮其根為烏藥卮藍與

此所以染也今西安之染者用歙之茈菊種類尤多頃
歙人有王子發者為圖凡八十一種牡丹出於黟本自
洛移植其後歲盛中興無洛花好事者於此取之然無
益於俗不足廣載黃精者生山之陰視其華之白以別
鉤吻土人號為甜蕨亦曰胡孫薑僊靈脾者淫羊藿是
也天仙之藤其子為馬兜五倍子大者如桃其中皆蟲
一名數檻桃桔梗之大而無心者為薺芎或用作假葎
賣之於他郡厚朴之薄者或刮其皮以物煮之為假桂

又有地黃茯苓五味此胡白芨黃蘗旋覆菴蘭木賊穀
精五加細辛鶴蝨百部通草木通玄參狼毒栝樓地松
萍艾苦參謹火忍冬萱草卷柏蓖麻草犀杜仲蒴藿音朔
茜草蜀葵金星地錦葎草夏枯懷香薄荷覆盆草烏
瞿麥芫花白斂前胡及天門冬霹靂矢何首烏之屬

木果

木則松梓楓柏檣榆槐檀赤白之櫟歲聯為杼以下澗
河大抵松櫟為尤多而其外則紙漆茶茗以為貨桑之

類有花桑遇葉少時亦可以食蠶柘有青柘有柿柘柿
柘葉如柿結實如楮而絕紅然能病蠶黃柘最少而最
宜蠶晝堅而不彫實小於椶或甘或苦檜則土人謂之
圓柏楡葉如披而子赤材理麤謂之楡柏楡葉大如
車輪樟豫章也椶則櫟也石枏聳而蒙密古之交讓也
棟之實甘故為鳳所食冬青歲晏不彫所謂萬年枝也
相思似之巖桂秋後作華四出而絕香山中人謂之小
相思山桂葉銳而可喜木莖以夏華桐首春而榮其別

有三桐材輕利頃歲有悞發貞觀中藏者其桐棺如故
問之鄉人云桐材既乾復以其膏漬之則終古不壞梧
碧梧也有乳者也柳與楊之類最多柎柳枝弱黃楊性
堅以閏為厄椿樗白楊紫荊狗骨皆散木也楓散木也
而有香梁任昉為太守調香二石始入三斗遽出教止
之烏臼可為燭而歛之人不取南燭叢生春晚苗葉紅
赤照耀山谷道家用作餽飯其色青故又謂之青精飯
非人家庭館所植南天竹也檄檻結穗霜後白如鹽而

酸醎椒櫟茱萸所以去濕阜之為物莢經所謂宜阜物者也夜夾莢者夜合也可以治繭即合歡蠲忿者也總小木之多刺而無枝者榔栗小木可用以為杖柞以為榔石膚之屬以為炭擦以為觴枸以為鞍簷戒木高華白而下垂花如百合棗或脆而多津或大而理疎丁香棗者紫黑不類棗其蒂核皮肉正柿之絕小者耳一名牛乳柿蓋古之楨也山棗似橄欖而圓剝之正白如涕栗則或毛或澤小者獨顯而圓狙公所賦芋也榛花長

而實細枳椇味在枝杪霜後絕甜一曲一直如枘之承
拱故一名曲枘一名木蜜一名堅枸木以其材為柱能
敗室中酒味古以椇為婦贄今不復貴木瓜實小不及
宛陵植櫨者苦木瓜而不臧者也香櫨甚小所謂楹梲
也棠甘棠也棠有霜後黑而糜者曰青沙爛梨之類多
種大抵歛梨皆津而消其質易傷蜂犯之則為癩故土
人率以柿油漬紙為囊就枝苞封之霜後始收今出丁
字橋者名天下近城多楊梅南朝時太守所採任昉以

冒險多物故而停絕銀杏葉如鴨蹠實外有皮山中人貯之及柿之紅者以為酢棓似柿而青黑所謂烏棓之柿也本草圖經棓柿出宣歙荆襄閩廣諸州柿美而益人棓又制丹石毒被之小而美者出於黔古稱被出玉山世以為上饒而漢志歙有玉山未知孰是其木為什器几案則明潔而宜漆爾雅曰櫨被按二物葉甚相類但櫨聳而被垂被又有佳實此為不同耳其外則桃李梅杏含桃來禽枇杷胡桃安石榴橙橘柚之屬大率山

寒不宜橘柚種者築池中為交午之道列植其上水氣
四面薄之則不畏霜雪婺源則有金橘竹有苦淡紫斑
篁篁之名老竹長尺則曲挑枝四寸有節慈竹叢生不
離母又四時有筍一名四季竹對青竹枝幹皆金色唯
一邊起枝處青碧大率金碧相輝可愛休寧有拜竹苦
竹之極大者也婺源苦竹之筍大者為花筍筍又有冬
筍績理而甘祁門時有貓頭竹

水族

歟居山間無大陂澤其谿流清淺春夏潦水注之則深往往有魚而不常得疏池以養者多鯉鯢與鯖鯉黃魴黑而鯖青大率相類首春鬻魚苗者來自湖口界中買纔數寸日取草飼之又蓄鯁其中使相從以長鯁鯽也大頭而細鱗魚之不美者也是數魚者不過終歲盈尺矣其隨水所在而有者為鰕為鯽為烏鱧為鮎為鰕鰕古之魴也鯽魴也烏鱧比他魚為魴古之鱧也以其與鯉音相近故以其色繫之也鮎古之鰕也其大而多鬚

者曰鰈鰕巨口而細鱗其牡文采尤鮮明繫之溪中可
以致羣牝或以鮮明者為鱸鰕亦曰蘆花鰕大率盛夏
藏石罅中徒手捫得之仙人甯封子所食石桂也重脣
乘桃花水而上味極腴陸機所謂吹沙小魚蓋古之鯊
也童魚亦以二月來小而為羣首如科斗古之童子魚
也白條白如銀即鯪魚也石斑青而揚赤夏月食其子
令人善嘔土步鱗黑而肉白即土父也鰕魚鬣赤一去
極遠絕有力者鰕州南大潭中截溪為網大率鰕鯪鯪

鰕色別為羣唯鰕為大將其羣以先欲觸網破則羣魚隨之而出網不破往往悶絕此魚之豪橫耿介者也鰕赤目多獨行或二三相從見網輒遁鰕魚味美而不常有鰕魚略似鰕多纖骨黃尾魚如鰕而尾黃婺源謂之黃姑魚鰕伏泥中鰕黃質黑章黃鰕鰕也色黃無鱗搦之有聲亦名黃鰕鰕長如蛟伏深泥中負黑抱白無鱗而甚腴掌禹錫云鰕鰕五色者出歙州舊經又有檻都不知何魚也谿中小魚凡五六十種鰕有三竹管鰕

體圓蘆花鰕長大板鰕似鯽乃石鰕也鰕魮亦有三角而纖者有頭大而促者有極小如指者名各不同石鯽長而尾紅旁皮魚似石鯽而尾青石活魚常在石中鉤子魚黃公魚皆以春三月團聚而上梭子魚首尾銳其大如指師官魚亦如指大有長鬚四五略如鰕魮沙鰕上脣如鷹喙長者尺有五寸古儂鰕魚色黑斑有蟲寄其腹中或一或二大者如負蟹小者如鼠婦穴其髯旁以食餘不可勝載其外骨則龜黿螺蚌倮蟲則蛙蛇

之屬

羽族

羽物則翬雉五色黃鳥鵯而黃鸝公布穀也食麥即去
鵯鵯者鵯雄也斑鳩最拙古之頒鳩也青鳩色蒼綠人
多蓄之鵯小而善鬪鵯嘲能為聲秭歸候歲而先鳴鵯
逢春則聲圓美而可喜至夏不復鳴故詩曰懷我好音
夏鷄以五六月終夜號田中竹雞如鷓鴣天將雨則為
泥滑滑之聲蠹蟬聞之則化而為水白鷗大如雞白質

黑章其穉純黑南越尉佗所獻也耿介不可馴古稱黃山之馴者伏以家雞山雞文采似白鷗而小綠雞色綠皆雉之類鷹鷂善搏啄木善啄鷯戴勝也頭有華勝故以降于桑為蠶事之候山鵲色蒼綠味足皆赤特其首尾輕翹而好為聲要為鵲之類水鵲甚似鵲而小好在
水旁人以其聲為喜也烏大而反哺慈烏小而多聲鴨
鵝鳴將旦體雖小鷹與烏不能敵也其尾如匕一名青
鷗一名鷗白燕雀伏翼棲集人家者也胡燕大而越燕

紫其巢亦異百舌反舌也咧咧一名花鵲能為聲其在瓦中色蒼者為鸛鵒婆餅焦者巧婦其巢如刺戟也搖鷦者脊令行則自搖其鷦也喚姑大如鳩黑色長尾唯兩翅赤而不鮮其音呱呱淘河者鷽淘去河水而取魚也鷽鷽約頸以環使沒水取魚為人用者也魚鷹翔水上以兩爪搦魚挽就水次啄食之小鮮則銜以飛鵲兩翼白其鳴自呼好在田中又有鳥大小如鵲黑而長喙林宿而水食其聲澌而不揚令人惡聞者名曰賣瓦鳴

則當晴鷺之類而翼下紅者曰紅鶴翠碧鸛鵒鵒鵒皆
水鳥也俗之言駕去鵞者鵞也白頭翁者頭白畫麋眉
似畫也在水曰水畫在籬塹中者曰塹畫小者石畫亦
取其聲以候陰晴白練小雀尾如曳練也山雀如家雀
稍大而微赤青菜言菜色也囷子似山雞而小無尾鵒
徒河切鳥一名楚雞尤愛其羽中矰弋則守死不動郡國
志曰翎下有青紅相應如垂綬其狀如蜀雞背若朱蛇
又有紅鵲鷓鴣山鷓鴣同力自囷以下凡六物祥符經

所書

獸類

吳赤烏中新都言白虎見宋元嘉中太守到元度又得
白熊以獻皆見於史土人以熊之高大而似馬者為馬
熊庫小似豬者為豬熊野豕有奇牙大者數百斤類能
傷人冬伏於深谷聚籜之下獵者矛箝之號槍鬆豕蒙
如簪長五六寸能激以射人蝟似鼠而毛勁縮之如栗
房其皮可以治練山羊角細而驄色能越峻險大山乃

有之豺似黃狗而長數十為羣好竊羊以食狸有猫斑者有豹文者牛尾狸的顙而大尾蟄則不食舐掌而肥別名曰白額亦曰玉面狸也竹狗似之而臊獾豚體促可三四斤顙亦白獺之小者土人謂之抓鰯鰲鯉四足而巨鱗其光如鯉能陸能水可以已蟻蝻山中時有鹿麝而尤多麝兔狐沐猴之屬麝之驄色者麝其大如麝而黑者俗謂之郭舊經有獐獬則未知二者之果有否也鼠之豐尾者曰栗鼠亦曰松狗漢侍中所珥貂也鼯

者五技之鼠大而有翼飛且乳夜呼為怪祥者也鼠狼似鼠而要脊長善捕鼠亦以媒鳥雀

畜擾

其畜擾有蜀馬亦頗有驢騾駝駟之屬駝駟者馬父驢子也水牛色蒼而多力其角如環古所謂吳牛也黃牛小而垂胡色雜駮不正黃土之所產亦有從江西來者自績溪以往牛羊之牧不收歛之南境羊晝夜山谷中不畏露草豚買於宛陵界中中家以上歲別飼大豕至

二三百斤歲終以祭享謂之年彘而方輿記以火肉石芥為民之珍其餘則雞犬鵝鶩雞高而善鬪者所謂魯雞也烏雞冠珥皆青肉色如墨時或有之號能已病

貨賄

舊稱歛有金與銀而今無有以國朝會要考之出金之州十出銀之州四十有二歛無預焉良木之產則已見於右方而茶則有勝金嫩柔僊芝來泉先春運合華英之品又有不及號者是為片茶八種其散茶號茗茶而

紙亦有麥光白滑冰翼凝霜之目今歙縣績溪界中有地名龍鬚者紙出其間故世號龍鬚紙大抵新安之水清徹見底利以漚楮故紙之成振之似玉雪者水色所為也其歲晏敲冰為之者益堅靱而佳漆則諸邑皆有之山民夜刺漆插竹筧其中凌曉涓滴取之用匕刮筒中礫礫有聲其勤至矣歲旱則益少天時雨汁則又不佳研出於婺源之龍尾山肇於唐開元葉氏墨出於歙之黃山肇於唐末李超廷珪父子自南唐以來貴之物

有盛衰工有良苦不能如其舊簞出於休寧所從來久
梁沈約彈歛令仲文秀橫訂吏黃法先輸六尺笙四十
領笙即簞也又有楓香及蜜刺史任昉棄而不取土人
為楊行密諱謂蜜為蜂糖云蠟本出武都山谷蜜房木
石之間掌禹錫以為宣歙唐鄧伊洛間尤多又有白石
英陶隱居云今醫家用新安所出極細長白澈者壽陽
八公山多大者不止用之僊方大小並有用惟須精細
無瑕者

叙貢賦

新安為郡在萬山間其地險陜而不夷其土駢剛而不
化水湍悍少瀦蓄自其郡邑固已踐山為城至於四郊
都鄙則又可知也大山之所落深谷之所窮民之田其
間者層累而上指十數級不能為一畝快步剡耜不得
旋其間刀耕而火種之十日不雨則叩天而呼一遇雨
澤山水暴出則糞壤與禾蕩然一空蓋地之勤民力者
如此宣饒之田彌望數百畝民相與杭稌之歲纔一芸

時雨既至禾稗相依以長而其人亦終歲飽食不待究其力歛之人芸以三四方夏五六月田水如湯父子袒跣膝行其中渥深泥抵隆日蚊蠅之所撲緣蟲蛭之所攻毒雖數苦有不得避其生勤矣而租挈又重蓋特起於唐末偽刺史陶雅之所增異時去京師遠有司未及以為言今天子愍之數下恩詔收退絹省雜錢凡可以惠其人者將無所愛要以盡去百年之積弊夫達民瘼廣上恩不牽吏議良有司能之時之利害故備論其事

稅則

新安三壤之則歙休寧祁門績溪黟上田園每畝稅錢
二百為夏稅紬四寸絹一尺三寸布一尺綿三錢見錢
五十五鹽錢十二腳錢十二此三色雜錢者又折變為
絹四尺三寸綿四錢五分麥一升二合秋苗則米二斗
二升耗米四升四合鹽錢十二義倉二升二合中田園
每畝稅錢百五十為夏稅紬三寸絹一尺二寸五分布
五寸綿二錢見錢四十三文七分五釐鹽錢九文腳錢

八文三色雜錢又折變為絹三尺四寸綿三錢麥九合
秋苗則米一斗七升七合耗三升五合鹽錢九文義倉
一升九合下田園稅錢每畝百文為夏稅紬一寸二分
絹一尺五寸布二寸五分綿一錢見錢二十七文七分
五釐鹽錢六文腳錢六文三色雜錢又折變為絹二尺
二寸綿一錢五分麥六合秋苗則米一斗三升三合耗
二升七合鹽錢六文義倉一升三合大率上田產米二
石者田主之收什六七夏秋之稅度用錢二千八百自

餘中田下田以次率之此其大凡也先是唐行兩税法至昭宗景福中楊行密逐唐刺史裴樞而使其偽將陶雅代之及田頔以宣州背行密行密破頔併收其家頔母辭曰門外之事妾未嘗與知也但聞歙州陶四常有私書往來今置不問而戮一老婦人何益頔與雅皆行密里人以羣盜起合肥同功一體之人也行密召雅至揚州久留不遣雅懼求歸郡斂羨餘以獻會左右亦為之請且曰歙州地陋而人富前日裴樞一書生守之而

諸將不能下今南鄰錢鏐西備鍾傳又順義軍汪武介
於其間不為吾用二鄙窺伺而因循乏守非計之得者
也行密亦悟雅始得還且欲實前言以固寵因增稅以
取之於是此州之賦遂重天下矣此見於故老所傳與
崇寧中鄉貢進士俞師覺上宰相之書以唐五代諸書
考之雅以景福二年來守時錢鏐以杭睦扼其南鍾傳
以饒州當其西汪武割婺源為順義軍鯁其側雅楊氏
宿將獨以一州之力為之外蔽四封有警輒提其兵以

出蓋嘗西伐鍾傳執汪武南救睦州虜錢鑑攻婺州執
刺史沈夏又因陳詢不能守睦州取之已而諸州皆復
為鏐所有既又襲饒信信州刺史危仔倡請降饒州刺
史唐寶棄城走在郡二十餘年兵革數動舊賦之入不
足以充軍此其勢必至於增賦不特為羨餘而已今以
宣饒池諸縣壤土相接者較之太平之接於歙縣者其
田亦三等稅錢自十二至九文苗米自一斗三升九合
至一斗有半浮梁之接祁門者稅錢自二十四至十四

苗米自五升五合至三升三合旌德之接績溪者稅錢
自六十至四十米自一斗八升八合至一斗四升開化
之接休寧者稅錢自七文至四文八分米自四升四合
至三升石埭之接黟者稅錢自十二至八文米自一斗
一升七合至六升五合其與稅錢二百苗米二斗麥八
合八龠加以雜錢二十四文展轉折變之者為不侔矣
唯婺源稅則稍異或言婺源以汪武所據故陶雅不得
有所增然雅以天復三年縛武於軍則是婺源終屬於

雅矣雅在郡甚久勢不容獨有所略今以婺源稅則考之上田稅錢每畝四十二苗米四升二合中田四十米四升下田三十八米三升八合較之鄰境樂平鄱陽之屬樂平建節鄉稅錢自十三至九文米自三升八合至二升八合鄱陽稅錢自十文至七文米自四升至二升其輕於婺源亦數倍是雅已嘗有所增矣又此縣米價尤賤故有田者亦不能多取贏焉凡六縣田產未經界前為百五十一萬六千三百畝半經界為三百萬餘畝

今為二百九十一萬九千五百五十三畝有奇稅錢十一萬一千七百八貫二百三十九文

雜錢

雜錢凡三色皆起於五代割據時稱鹽錢者官據口給食鹽而斂其直稱麴錢者給民麴使得釀酒而歸其麴之直於官稱腳錢者每貫出錢五十以備解發至廣陵及南唐之末淮南產鹽之郡為周世宗所下無以給民因以舊所得之數紐為正稅但輸之及國家削平僭亂

酒酤在官不復給麴而轉輸之費出於公上有司因循失於申請每稅錢一貫者輒存此三色為錢三貫九百五十總名曰雜錢別而言之則曰鹽錢麴錢腳錢亦曰鹽錢腳錢見錢凡為錢五萬緡有奇其後有司不直令輸錢從而折變之故於稅絹之外有折錢絹稅紬之外有折錢紬稅綿之外有折錢綿苗米之外有折錢米苗麥之外有折錢麥其多寡歲不同然舊制郡納紬絹每匹不過數兩故絹折錢七百七十紬折錢七百三十

一布折錢三百五十綿每兩正耗折錢六十二文五分
猶為相近自頃物帛益好價直益高而所折之直猶如
其故大率數倍於五萬緡之數紹興中推行經界尚書
郎章侯為時相力言民病請因蠲減重賦不見聽至今
上乾道六年郊侯任滿賜對乞將雜錢所折之絹減半
而拘江東漕司歲所取本州寬剩絹六千匹折斛錢三
萬緡并額外科往建康府絹五千匹歸大農補還減半
之數天子以為然事下戶部戶部按律非法擅賦斂及

科買折納而反覆折紐或別納錢物者具其科條行下
約束而令江東諸司公共相度閱再期不報前江東安
撫司主管機宜文字章謙言於朝以為安撫司已相度
乞減雜錢之半而拘漕司建康府絹各半折斛錢三之
一還戶部可以補還雜錢減半之數且牒諸司矣而至
今未申部者由比年吏强官弱帥守監司雖欲奉承而
吏不欲也願嚴立限趣令申上八年五月十一日朝旨
下諸司期以半月諸司即用此議上而戶部又請將折

斛錢亦減其半大約通計減錢二萬一千六百餘貫乞
紐充減落雜錢之數七月二十五日奏天子可之委漕
臣取見均減雜錢等名額實數督責守令不得依前科
擾務要恩惠及民是日又有旨將徽州減免不盡雜錢
盡數蠲免以寬民力具本州認發漕司絹三千匹折斛
錢萬五千貫建康府絹二千五百匹亦與放免却令戶
部於沙田蘆場錢內撥還而郡以邾侯初指為歛休寧
等五縣請故雜錢只三萬七千餘緡然合婺源計之實

五萬四千餘緡今一切蠲免則郡計所失多乃審於戶部而漕司又以折斛錢三萬緡通雜錢五萬緡合為八萬緡數目不同乃繼委部使者覈實於是以鹽腳錢一萬二千一百八十餘緡為雜錢其見錢四萬緡非也詔如具數免一萬二千一百八十餘緡而有司以為轉運司折斛錢三萬緡建康府絹五千匹者皆秋苗科折非雜錢之例下郡椿發如具故

夏稅物帛

夏稅紬二千九百九十六匹一尺八寸七分絹三萬四百一十三匹五尺四寸七分綿二十萬八千八百三十三兩四錢一分布五千六百八十五匹二丈四尺八寸五分而雜錢所折紬絹綿不在此數又有軍衫布三千一百五十匹亦楊氏時歲於民間以鹽博之每匹給鹽七斤半其後亦以無鹽直令輸納今自稅錢五貫以上科敷每貫納布三尺六寸有奇隨夏稅輸之此物帛之大數也本朝翰林學士沈括稱國初蠲正五代方鎮割

據稅外多取之弊其有輕重未均處稍隨事均之福歙
稅額太重故福州纔令以錢二百五十折納絹一匹歙
州輸官之絹只重數兩後人往往疑浙絹太重蓋不見
當時之意此括之所載於其書可考者也至其後亦不
能盡如國初數兩之制然令甲江東一路稅絹俱重十
二兩獨歙州以咸平二年特旨只以十兩為定并下庫
務不得退剥每匹折錢七百三十一文元豐二年四月
二十一日勅將歙州預買絹錢每匹作九百五十文至

紹興十八年戶部符每匹估時價錢二貫足而江東轉運司則每匹納一貫八百足蓋大率如此而婺源所納紬絹歲差大戶自縣起發徑赴左帑乾道三年以疎怯見卻時守臣乞以所退每匹折省錢三千於其中豁除頭子朱墨等錢買輕齋解赴左帑天子愍之詔婺源絹如未給散人戶却解赴左藏庫交納或已給散即依所乞權折錢一次而以守臣為擾鑄秩罷之故其謫詞曰不念繭絲之闕靡思杼柚之空然則聖意拳拳於歛民

可知矣是月又奏以為近者戶部退剝徽絹又契勘索州建昌軍不中物帛然皆有繼恩詔仰見聖意止欲戒其已甚不務過求而諸處受納監官望風懼罪縱吏邀阻如十二兩者至更求十三兩止產黃絲者求其白絲年例屑絲者責其細絲如此非一遂使攬戶恣求常歲匹四千者增為六千猶不能中或高價折錢分遣人於產絹去處買納豈不重擾欲望降旨禁戢州縣不得矯枉過正及於常數外邀取詔復從之

小麥

小麥有稅錢及百文者輸五穀凡六千三十三石一斗五升六合或議以為紬絹者上三等所有而布與麥者第四等以下小戶所產故鄰郡往往等第分納之而新安不計等第每戶夏稅凡納十三色至乾道四五年以後第五等戶又認納雜錢名為四色其實稅紬稅絹正綿正麥錢紬錢絹錢綿錢麥而麥一斗者久有義麥凡九色矣

秋稅糙米

秋稅糙米合六縣為十五萬九千四百八十一石六斗一升七合租課糙米一千四十六石九斗八升九合五龠熟米九石九斗七升郡大率土壤薄不宜於秔故梁任昉為新安太守去郡唯有桃花米二十石今紅蝦私是也秔既不多有故下戶有折解錢自苗米一石以下每斗折納見錢五十六文足貧民以為便自頃軍食日多乃增就附近三縣取米則三縣下戶得納錢者益少

今自一斗九升以上皆輸米又有糯豆草錢紬米絹米之屬

折帛錢

上供折帛錢凡紬一萬六千一百九匹三丈絹二萬四千七百九十六匹每匹各折省錢六千綿萬七千二百二十七兩每兩折省錢三百凡為錢二十五萬六千一百貫六百文先是州稅絹每匹為稅錢七百三十一而預買以元豐二年勅每匹作九百五十文逮折帛初行以

兩浙上色紬絹為估每匹八千而徽則減二千為六千至紹興十八年江東西路例作六千其後兩浙路亦然而徽遂不復請乾道五年議臣奏曰折帛之起以浙絹定價故每匹估價錢六千而銀則每兩為價三千三百徽州係五季重稅去處咸平著令他州絹以十二兩為則而歙州但責十兩而已從來名為下色紬絹所以補除重稅也折帛之行以兩浙上色所估而責徽州下色亦同其直失先朝補恤之意然議者方主言郡吏折銀

虧直聖上令部使者約束而折帛之價未有申論者

進貢

唐六典州貢白苧布太府卿以布之方土精麤為九等而歛之苧在第七通典貢苧十五端竹簞一合新唐書又有紙及黃連國朝貢表紙麥光白滑冰翼紙乾預藥臘牙茶細布景德四年閏五月詔特減放諸郡六十六處貢物而歛所貢七物在其數中且飭官吏後不得以土貢為名妄有配率熙寧中貢白滑紙千張大龍鳳墨

十斤元豐中貢白苧十匹紙如熙寧而無墨今貢白苧
十匹其天申節進奉有銀絹五百匹兩

上供物帛

上供紬歲四千五百九十八匹一丈六尺八寸絹八萬
三千三百七十七匹九尺九寸綿十萬二千二百二十
六兩七錢絲二百兩分四綱起發又有淮衣綱紬四十
八匹八尺四寸絹萬三千一十四匹一丈二尺六寸舊至
揚州中興併送行在所具非上供應副本路及他路者

建康府絹五千匹即前所奏免今復起發者也又有兩浙轉運司紬千四百匹絹萬六千四十九匹有奇綿六萬五千兩又別應副衢州嚴州紬各一百五十七匹半絹各千三百三十匹綿各二千二百七十五兩處州紬百七十五匹絹九百八十匹綿三千五百兩婺州紬七十匹絹千九百六十匹綿千五百兩四州歲各遣吏來請蓋自紹興十四年四月江東轉運司始報兩浙運司以應副四州之數不知始於何年

上供紙

上供七色紙歲百四十四萬八千六百三十二張七色者常樣降樣大抄京運三抄京運小抄自三抄以下折買奏紙是為七外有年額折錢紙用以折買大抄皆以上下限起發赴左藏庫又有學士院紙右漕紙鹽鈔茶引紙之屬不在其數中始大中祥符四年六月上以歛州歲供大紙數多頗勞民思有以寬之知樞密院王欽若奏本院諸房所請歛州表紙自元年後置厯拘管今

支使外剩十一萬八千三百張望下三司住支一年及於本州減造從之又遣中使就院宣諭副都承旨張質已下於太平興國寺賜御宴今供數不知何年所定

酒課

酒課按國朝會要舊在城及休寧祁門婺源績溪黟六務酒麴歲二萬九千八百七貫熙寧十年祖額二萬一千六百十四貫五百五十四文買撲一千八百六十三貫二百八十三文而不別每務所入之數今在城一務

酒課用紹興二十年所收為額計三萬八百二十八貫
一百八十七文巖寺鎮酒課并六縣坊場五十三所其
三年各課官錢淨利錢三萬六千七百六十九貫二百
七文增添三分錢七千二百三十九貫五百五十一文
課利錢五千一百八十七貫二百三十文隨界二分錢
一百七十貫七十二文

稅課

稅課按會要舊在城及休寧祁門婺源績溪黟六縣歲

萬三千五百三十七貫熙寧十年在城一萬三千二百五十八貫一百二十文今以紹興二十二年所收為額計六千一百一十貫八十七文河渡合歙縣婺源凡三處每界三年計淨利錢二百四貫二百九十一文

茶課

州舊買茶以熙寧十年為額歲買六萬一千二百六十四斤其片茶有華英先春來泉而散茶有茗茶並以折稅國家異時六權貨務其在真州者受洪宣歙撫十五

州之茶為額五十一萬有奇在無為軍者受洪宣歛饒
十三州之茶為額四十三萬有奇用以給商人今於在
京及樞務入納見錢筭請真州務賣歛茶勝金為錢五
百四十三嫩桑五百八十八華英五百二十運合五百
三十八來泉四百六十二先春四百八十八僊芝五百
三十不及號四百四十六無為軍務賣先春四百七十
一來泉嫩桑並四百六十二而州自賣折稅茗茶每斤
二十七逮宣和改茶法招誘商販而不復科買人以為

便歲額二百萬有奇茶租錢者起於嘉祐中宣州以此錢千八百七十四貫文均在本州今民戶自稅錢二貫省以上者每貫敷錢五十

鹽課

舊鹽額熙寧十年在城二萬七百九十貫二百五十七文休寧九千七百五十七貫六百二十文績溪二千七百九十四貫一百一十文黟縣五千九百五十四貫七百二十文祁門八千八百九十九貫三百八十五文婺源

源萬三千七百七十七貫七百三十五文自太平興國中三司建議以歛接近兩浙界令就般請兩浙鹽每斤為錢五十自宣和末變法歲遣衙校往請之今郡學廊廡乃故鹽場地或言歛所以輸兩浙運司絹者以鹽故也鹽法既變不復般請今招誘亦歲二百萬有奇

公用

國朝典故三京及諸道州府軍監公用錢舊皆有常數其官高及曾任中書樞密院者臨時取旨加給並準宣

定支計月均給知州通判或職官上厯支歲終支不盡者納州庫若大兩省橫行使以上充此差遣有添賜錢數皆係特旨熙寧中特增近其額而分四季支內歛州八百貫具公用酒太平興國六年九月定制河南應天以下六府曹鄴以下六十六州月各給一石歛州在其數中

新安志卷二